




Ol memba bilong lain bilong Yunaitet Nesens i kam lukluk raun long Teritori long yia 1965. Em hia ol i stap long Kompian. Ol memba i sindaun i stap (kirap long lephan): Mista Dermot J. Swan (Englan), Andre Naudy (Frans), Dwight Dickinson (Amerika), Nathaniel Eastman (Liberia). (Yunaitet Nesens poto)

ATING
YUNAITET NESENS
I GIVIM
GUTPELA RIPO
LONG NIUGINI
O NOGUT?



Long yia 1968 dispela Visiting Misin bilong Yunaitet Nesens i kamap long Niugini. Hia ol i stap long Rabaul long taim bilong ileksen. Nem bilong ol em hia (kirap long lephan): Mista A. V. Caine (Liberia), Mista J.M. McEwan (Nu Silan), Mista W. Allen (Amerika), na Mista P. Gaschnard (Frans).
(D.I.E.S.poto)



Ol memba bilong 1971 Visiting Misin bilong Yunaitet Nesens i bung insait long wampela haus bus long Isten Hailans. Em ol hia (kirap long lephan): Sir Denis Allen (Englan), Mista Paul Blanc (Frans), na Mista Adnam Raouf (Irak)
(D.I.E.S. poto)



Sampela skulboi bilong Aitape Haiskul i stap wokim wan-
pela haus paiaman bilong smokim ol kopra.



Ol memba bilong Yu
i sekan wantaim ol s
Isten Hailans. Em r
laphan): Mista Charl
Mista Adnan Raouf. I
Sinclair, kiap bilon
taim. (D.I.E.S. p



Tupela nes hia i stap long medikal skul. Tupela i
lukim man hia i smok i stap, na tupela i ting: Nogut
yu smok planti na yu tu yu go bun nating olgeta.



Ol memba bilong Yunaitet Nesens V
baran bilong Maprik. Dua bilong ha
Is Sepik Distrik i sanap klostu lon

I KAM

I LUKLUK

I GO



Ol 4-pela man bilong Visiting Misin bilong Yunaitet Nesens i bin lukluk raun tru long olgeta biktaun na klostu olgeta distrik bilong kantri bilong yumi. Dispela wik ol i go bek long ples.

Em hia nem bilong ol: Sir Denis Allen (Englan), Mista Paul Blanc (Frans), Mista Adnam Raouf (Irak), na Mista Charles Wyse (Sierra Leona). Em i namba 8 taim nau ol man bilong Yunaitet Nesens i kam lukluk raun.

Nau ol i go bek long Nu Yok long Amerika bilong givim ripot long Kaunsil bilong ol Teritori bilong Yunaitet Nesens.

Bougainville

Sosaiti ol i kolim Napidakoe Navitu, i tok ol pipel bilong Bougainville yet i mas vot sapos ol i laik stap wantaim bikpela Niugini o nogat. Presiden bilong dispela sosaiti, Mista Charles Miriori, i tok ol waitman yet i no laikim ol lokal pipel i go het.

.....

Mista Adnam Raouf, man bilong Yunaitet Nesens Visiting Misin i kam long kantri Irak, i tokim ol man long Buka: i tru, kantri bilong em yet na planti arapela kantri tu i bin kisim independens taim ol i no gat planti saveman yet. Em i tok olsem bikos sampela spika i no laikim selp gavman inap long taim i gat moa saveman long Teritori.

Samting olsem 700 manmeri i bin kam long kibung.

.....

Nu Briten

Sir Denis Allen, siaman bilong Visiting Mis-

in, i tokim ol man hia em i ting dispela kantri i bin winim olgeta arapela kantri long go het long 10-pela yia i go pinis.

Em i tokim ol kaunsila bilong Gazelle ol i mas helpim tu go het bilong ol arapela hap bilong Nu Briten i stap longwe long Rabaul.

Em i tokim ol kaunsila Visiting Misin i save ol hap bilong bus bilong Niugini i gat kain kain wari na kain kain pasin, na i mas go het long pasin bilong en yet. Ol man i no ken ting bai Niugini olsem Australia; nogat.

.....

Ol man i lusim ples bilong ol long Sepik na long Chimbu na i stap wok nau long ol nupela plantasin bilong wel pam, ol i autim wari bilong ol.

Wanpela man, Mista Joseph Tokoko, i spik ol wokman hia i sindaun olsem ol pik samting. Sampela famili i gat 12-pela pikinini na haus bilong ol i liklik tumas.

Long mun Jun samting bai bikpela faktori long Mosa inap statim wok bi-

long en na olgeta wok bilong wel pam tri i ken bigin long winim mani long ol man i kisim nupela graun long dispela hap.

.....

Nu Ailan

I no gat wanpela miting inap long dispela bilong Kavieng. Em i winim 3 aua na ol man bilong Visiting Misin i belhat tru. Klostu ol i lusim miting i go. As bilong trabel em hia: sampela man i strong long toktok planti na tupela taim yet.

Misis Elti Kumak, presiden bilong Asosiesen bilong ol meri bilong Nu Ailan, i tok se olgeta toktok bilong independens i no kamap long ol viles pipel. Em i laikim independens long yia 1976.

.....

Manus

Hia 800 manmeri i bungim Yunaitet Nesens Visiting Misin long Lorengau.

Sampela man i tokim ol man bilong Yunaitet Nesens ol i pilim sampela hap bilong ol plantasin i bilong ol yet. Long wanem ol waitman i baim pinis long Jeman taim yet. Ol i baim long naip na tabak na kain liklik samting olsem, na i no stret. Mista Blanc bilong Yunaitet Nesens i bekim tok i spik, bai ol i painimaut sapos dispela ol samting i tru.

Vanimo

Presiden bilong Vanimo kaunsil, Mista Wagera Kenu, i tok ol i mas bungim Wes Irian wantaim Teritori bipo selp gavman i kamap. Sampela arapela kaunsila tu i autim tok bilong ol i spik, ol i pret long ol Indonesia i stap arasait long mak bilong Niugini.

Hia Denis Allen i tok, ol man mas was long tingting na long wok bilong ol sapos ol i laik dispela kantri i sanap strong na i go het. Na em i tok tu, - sapos ol Indonesia i kam kisim dispela kantri, bai ol Niuginian i ken singaut long Yunaitet Nesens.

.....

Wewak

Taim Yunaitet Nesens Visiting Misin i kamap long Wewak, wanpela man nem bilong em William Hawarri i tok ol pipel i no ken baim skul na haus sik. Em i tok tu olsem ol plantasin wokman i mas kisim moa pe na i no ken mekim long ol olsem long ol binatang o bek kopra.

Mista Michael Somare i tok, Haus Asembli i ken lukautim ami bilong Papua Nu Gini na em yet i mas gat ofisa bilong em. Maski long ami bilong Australia i lukautim moa. I gat Haus Asembli bilong Teritori. Em yet i ken painim arapela kantri long kisim sampela helpim, long wanem Haus i gat strong nau bilong toktok.

PAS I KAM LONG EDITA

Sapos yu gat tok yu raitim sotpela tasol. Sapos yu raitim longpela bai mipela i sotim. Yu mas raitim nem bilong yu tru long olgeta pas i kam long mipela. Sapos yu no laik mipela prinim nem bilong yu tru, orait yu raitim arapela nem bilong yu tu.

Lain Leta

"P" Na "N"

Dia Edita.- Mi wanpela boi bilong Laiagam long Westen Hailan Distrik. Ples bilong mi Kanamanda. Mi tingting planti long ol laik senisim Papua Nu Gini long arapela nem gen.

Sampela pipel i laikim "Pagini" na sampela i laikim "Gini" na ol i toktok planti long dispela. Olsem na tingting bilong mi i ting olsem. Mipela i lusim leta "P" na "N". Olsem mipela ken painim narapela ol leta olsem Y, T, o K na spelim kantri bilong yumi. Olsem long Papua Nu Gini. Sapos yumi kolim Pagini em olsem "Pa" em i

Kaikai Buai

Dia Edita.- Mi laik toktok long mipela ol man long Niugini. Ol man i save kaikai buai na toktok wantaim ol masta i no laikim dispela. Em i soim olsem pasin nogut long ol. Tru Niugini man i save kaikai buai, tasol kaikai na klinim maus na kam toktok wantaim ol masta. Planti taim ol i kros long yumi. Mi tu mi save kaikai buai, tasol mi save klinim tit bilong mi na maus tu. Ol brata em i olsem toksave. Mi no stapim yupela long kaikai buai. Mi ting ol man long Niugini save kaikai na save pilim olsem spak na toktok. Klostu olsem bia bilong ol masta.

Harry Alois Kendoli,
Torembi.

"Papu" na "Gini" olsem Niugini.

Sapos husat man i no laikim toktok bilong mi orait yu raitim pas na salim i go long Wantok. Mi laik tok tenkyu tru long prinim dispela pas bilong mi.

Aiokolama Patage Kallan
Laiagam.

Brukbruk Trausis

Dia Edita.- Mi laik bekim wanpela pas bilong tambu kandere Frank J. Hanumbo bilong Kairiru. Frank i tok em i ting ol meri i ken putim sotpela sket. Yes brata yu ting dispela kain ol blakskin meri i putim sotpela sket em i gutpela a poroman? Yu save poroman, long ol waitskin i ken putim long wanem bipo tumbuna bilong ol i putim nau ol i bihainim, na em i stret long ol. Nau ol blakskin meri i laik bihainim olsem ol waitskin meri, mi lukim i no stret olgeta long ai bilong mi. Orait poroman nau yu harim. Sapos yu wantaim wanpela poroman bilong yu yutupela i wokabaut i go long rot, na yu ptuim ol gutpela siot na trausis. Na poroman bilong yu i putim brukbruk trausis, yu lukim em i orait long ai bilong yu a, poroman? Lukim poroman, kantri bilong mitupela i laik kamap nau. Na yu save tu long pasin bilong mipela yangpela man? Tru sampela bai i orait na sampela i nogut tru. Sapos ol meri

i putim sotpela sket tru, em yet i save paulim o kirapim tingting bilong boi, nau planti trabel i kamap long kantri bilong mipela.

Baptist Kuaintuo,
Warabung.

Nem Wantaim Mea

Dia Edita.- Mi laik toktok liklik long dispela nem bilong Papua na Niu Gini. Ol i tok "Pagini". Mi ting dispela nem i no gutpela tumas. Mi laikim Papua na Nu Gini dispela nem i mas stap stret, na plak tasol i orait. Mi laikim. Nem mi no laik. Mipela olgeta pipel inap long 300 i stap long Bulolo i no laikim Nem "Pagini". Mipela i laikim Papua na Nu Gini.

Paul Nanson,
Bulolo.

Longlora Buskanaka Kaunsil

Dia Edita.- Hia long Koianu eria long Bougainville i gat sampela buskanaka kaunsil tru. Mi yet mi save lukim long ai bilong mi. Ol i slip nating, Tasol i no gat wok bilong ol stret. Olsem ol i toktok na ol pipel long ples i no harim tok bilong ol. Ol i kisim nating nem kaunsila tasol ol i no save long mekim ol wok kaunsil. Taim kiap i kam bai dispela kaunsila i bikmaus nating long ol pipel bilong em long ai

bilong kiap. Kaunsila i ting, o mi toktok strong bai kiap i ting dispela kaunsila i strongpela man tru hia. Tasol taim ol i krai long kiap, kiap i save tok nau long dispela taim mipela i no gat paua antap long lokal gavman kaunsil. Ol dispela kaunsila i no save tru long mining bilong kaunsil.

Long Koianu eria ol pipel i votim wanpela lapunman oltaim, oltaim. Dispela man i longlong man stret, man bilong slip nating tru. I tru i gat tupela kain bikpela man na tupela kain yangpela man. Sampela i gutpela het na sampela i bikhet. Mobeta wok kaunsil i no ken stap long ol bikman long wanem ol i gat planti tingting bilong bipo na ol i no save long we bilong go hetim kantri bilong yumi.

Paul na Peter
Bougainville.

Banis Hambak

Dia Edita.- Mi laik autim wari bilong mi. Sori, mi yet mi save lukim sampela doktaboi i no save bihainim ol lo dokta i save givim ol. Wanpela samting taim bilong singsing ol i save putim ol banis na go singsing long en. Mi ting em i no stret. Banis em bilong pasim ol sua i no bilong amamas.

Long sampela krismas i go pinis, mi lukim wanpela doktaboi i givim sampela banis long sampela wantok meri bilong em. Ol i pasim na singsing long en. Sori wantok, traim na bihainim lo na wok bilong dokta. Kain olsem yu pinisim nating mani bilong bosman bilong yu laka.

Martin Magog,
Ruprup Ailan

Haus Lou Haus Danis

Dia Edita.- Mi gat liklik toktok bilong mi. Bai yupela inap prinim long Wantok nius? Yes, ol wantok i no longtaim mi ritim Wantok nius, na wanpela man i tok olsem long haus kaunsil. Dispela haus kaunsil i bilong wanem? Bilong miting o bilong pilai gita na danis o em i wanpela haus bung na pilai kain kain samting? Tru haus kaunsil em i haus bilong ol kaunsil. Em i no haus pilai. Wantok tok bilong yu i tru. Na namba tu tok. Yes ol wantok katolik yu save St. Fransis Hol klostu long haus kaunsil. Olsem wanem long dispela kain pasin. Mi lukim ol i pilai gita na danis na lukim piksa insait. Na olgeta Sande pater i mekim misa na ol man i go lotu. Long tingting bilong mi em i olsem, sapos haus bilong God em i bilong em tasol. Yumi no ken yusim olsem stua, maket, haus slip, na mekim olsem haus nating. Yumi ol katolik man, meri, bruder, pater, sister yumi save long Baibel. Yumi save wanpela. de Jisas i rausim ol man long haus lotu na paitim ol. Yumi save em i no save kros o pait na rausim man taim ol i kam long em. Tasol dispela taim ol i yusim haus bilong em olsem maket na stua. Em i tok olsem haus bilong papa em i no haus bilong salim samting na baim samting.

Ol misin traim na wokim wanpela haus bilong pilai, Sapos yu laik kisim liklik mani long en. No ken yusim haus bilong God olsem haus bilong pilai gita na danis. Sapos yu husat man o meri o pater, o bruder, na sister i laik bekim pas bilong mi orait rait i go long Wantok nius, bai mi ken kisim.

Andrew Dubuk
Wewak

Haus Long Haus

Dia Edita.- Mi lukim ol nes bilong Angau Memorial Haus sik i no stret long wok bilong ol. Mi sikman mi slip long haus sik na mi lukim tru long ai bilong mi. Dispela wok em i wok bilong Jisas Kraist ol i mas bihainim. Ol i mas wok olsem taim Jisas i bin kamap long graun na wok long sikman sikmeri sik pikinini, em i helpim ol. Tasol ol i wok long tingting bilong ol yet.

Taim ol i wok na wok i pinis ol i go ausait long taun painim ol man na pren long ol, na mekim kain kain pasin pa-

muk. Na bihain i kam givim marasin long ol sik pipel ol i no orait kwik. Ating ol i mekim olsem na planti bilong sik pipel i save dai.

Nibo Loneoi,
Bulolo.

Rabis Pas Tru

Dia Edita.- Bilong wanem yumi oltaim toktok long ol meri? I no longtaim mi kisim wanpela Wantok na mi ritim wanpela pas i kam long Francis Dama bilong Wes Nu Briten. Francis Dama i rait na tok. Bilong wanem ol yangpela meri i save salim skin bilong ol? Pren, mi no amamas tumas long dispela pas yu rait i kam long Wan-

tok em olgeta man i ritim pinis.

Rabis pas tru. Sapos yu laikim em i stapim dispela kain pasin, yu go long dispela kain meri i save salim skin bilong em orait tokim em. Na maski long yu salim pas i kam long Wantok. Yu longlong liklik. Ating het bilong yu i gat bikpela sua. Pren yu bin kam olsem wanem? Yu no kamap long meri? Tingting pastaim na rait.

John Tamaroto,
Bougainville.

Hebin Soldia

Dia Edita.- Yes ol wantok mi tu mi helpim ol soldia long Papua na Nu Gini. Na mi kros tru long ol haiskul man na meri. Mi ting olsem mobeta ol man na meri long haiskul i mas lusim dispela pasin nogut long tok bilas long ol soldia bilong yumi long Papua Nu Gini. Mi ting olsem ol soldia bilong yumi bilong banisim yumi na yumi go long haiskul na kisim gutpela save na kisim gutpela kaikai na slip gut, na marit na helpim yumi long go wok long sampela taun.

Mi helpim ol soldia na mi toksave long ol haiskul man na meri. Ol i mas lusim dispela pasin bilong tok bilas long ol soldia bilong yumi long Papua Nu Gini. Dispela ol soldia i no bilong Australia em ol bilong yumi.

Richart Amenguva,
Bulolo.

Wantok Yu Hono

Dia Edita.- Mi laik yu prinim liklik pas bilong mi bilong stretim wanpela hap nius i stap long Wantok namba 13. Yu bin tok 500 manmeri i bin kirap bikmaus na singaut long selp gavman long 1972 long miting bilong

selek komiti long Angoram.

Dispela i no stret. Mi wanpela Yuropen mi stap long dispela miting, na namba bilong ol i kirap na bikmaus inap long 40 samting tasol. Na olgeta manmeri long miting inap long 600-700 samting. Na ol manmeri i bin vot long selp gavman i no winim 500- ating 450 samting tasol.

Na mi no wari long selp gavman i kamap long 1972, tasol long tingting bilong mi, yu mas prinim ol nius stret olgeta. Yu no ken giaman long namba olsem.

Don Laycock, Angoram.

(Mipela i tenkyu long stretim tok bilong mipela. Dispela ol namba mipela i bin kisim long gavman yet. - Edita)

Bibela Wok Tok

Dia Edita.- Mi wanpela katekis bilong katolik misin. Yes wanpela samting mi lukim long ai bilong mi i no stret. Sampela katolik i marit pinis long pasin katolik na bihain lusim dispela meri na kisim narapela meri gen. Dispela pasin i no stret. Bikpela Jisas i tok. "Sapos wanpela man i lusim meri bilong em na kisim arapela meri, em i mekim rong long meri bilong em na i bagarapim marit. Na sapos wanpela meri i lusim man bilong em na kisim nupela man dispela meri i bagarapim marit." Wanpela samting tu i no stret. Sampela man i marit nating na bihain kisim ring, em i no stret. Sapos yu husat man belhat long dispela tok bilong mi, orait rait long Wantok.

Kuata Kletus
Bogia

Raun Bilong Selek Komiti

Hailans

Selek Komiti i kibung 13 taim long Hailans. Long 9-pela kibung planti pipel i no laikim selp gavman; tasol long 4-pela miting ol i laikim selp gavman i kamap bihain long 5-pela yia. Olsem yumi ken lukim tingting bilong ol pipel i senis liklik. Long yia i go pinis olgeta pipel i no laikim tru tok bilong selp gavman. Ol manmeri i laikim nem "Niugini"; ol i no laikim nem "Pagini".

Wapenamanda

Kaunsila Pangoo i tokim ol Selek Komiti, pipel bilong em i laikim Kompas Pati yet i ken stretim tok bilong selp gavman insait long Haus Asembli. Mista Frank Yasima bilong Yunivesiti i tok, ol wantok bilong em i ting planti long ol gaden na wok na pik bilong ol; ol i no tingting planti long ol politik. Ol i laikim Kompas Pati yet stiaim wok politik. Samting olsem 200 manmeri i kam long dispela miting.

Kerowil

Mista Andrew Sowelu, wanpela bisnisman bilong Papua, i tok Niugini i man gat selp gavman nau tasol. Sapos nogat, bai ol sampela man olsem Mista Whitlam bai i kam daunim ol tingting bilong ol lokal pipel. Sapos yumi gat selp gavman, orait, yumi ken bihainim tingting bilong yumi yet. Tasol planti man bilong Kerowil i no laikim selp gavman i kamap bipo long 1976. Mista Phillip Warmel, arapela tisa, i tok se: arapela haus i mas

gat planti gutpela pos. Olsem tasol Niugini i mas gat ol gutpela skul na gutpela bisnis sapos em i laik sanap strong. Klostu olgeta 6-pela miting long hap bilong Chimbu i no laikim selp gavman bipo long yia 1976.

Kainantu

Hia moa olsem 400 pipel i laikim nem "Niugini". Mista Peter Koiama, wanpela ofisa bilong Kainantu Haus Sik, i tok sapos selp gavman i no kamap long yia 1972, bai i gat planti lain olsem ol Mataungan i kamap mekim trabel nabaut. Narapela man i laikim bai gavman i givim moa strong long ol lokal ofisa na i tok i no gut olgeta strong i stap long Port Moresby tasol. Sampela man tu i tok ol skul na ol bisnis i mas go het planti yet.

Gumine

Ol man hia ol i laik soim Selek Komiti hap bilong ol i no redi yet long selp gavman, ol i rabis tumas yet. Olsem na ol i pasim ol target bilong ol na purpur, na ol i holim ol spia na banara; na ol i wokabout i kam olsem. Mista Kun Kubile i tokim Komiti ol wanlain bilong em i no gat mani bilong baim ol siot, trausis, su samting. Olsem tasol ol i no inap yet long selp gavman. Wanpela samting ol i laikim: gavman i mas putim Haus Asembli long hap bilong ol long Arona.

Hohola

Mista Albert Maori Kiki, kuskus bilong Pangu Pati, i tok olsem: "Mi-

pela Papua i redi nau tasol long selp gavman. Sapos ol Nu Gini i no inap yet, em i samting bilong ol. Mipela i laikim nau tasol." Mista Leo Hannett, wanpela skulman bilong Yunivesiti, i tok se em i no laikim Eksekutif Kaunsil bilong Administreta; mobeta Haus Asembli i kisim strong bilong dispela lain man. Planti pipel hia long Hohola i laikim wanpela gavman tasol na ol i ting bihain long independens bai i no gat wok bilong ol Ofisal Memba. Ol i laikim tupela nem: Niugini o Papua-Nu Gini.

Magarida

Ol man hia bilong Amazon Bay bilong Sentral Distrik i tok mobeta Papua na Nu Gini tupela i bung pastaim, bihain tasol selp gavman i ken kamap. Sampela man i laikim selp gavman i kamap long 1972 taim i gat nupela Haus Asembli. Tasol sampela arapela man gen i laik ol man i mas vot long selp gavman taim ol i vot long nupela Haus Asembli long 1972.

Kairiku

Ol man bilong ailan hia i laikim selp gavman long 1980. Mista L. Oua, wanpela tisa, i tok ol pipel i no gat save long ol politik yet na bisnis i no go het inap yet. Papua na Nu Gini tupela wantaim i kamap distrik bilong Australia stret.

Port Moresby

Hia long biktaun 40 manmeri tasol i kamap long miting long hap bilong Badili. I gat 5-pela tasol i sanap toktok.


Mista Paulus Arek, siaman bilong komiti, i tokim ol olsem: "Bel bilong mi i nogut mi lukim ol man bilong Moresby i les long ol politik. Man! Long Hailans planti man moa i bung. We stap wanpela lain pipel i ken kamapim gavman long laik bilong ol yet? Long planti ples gavman i no save askim pipel long laik bilong ol. Nogat. Na hia mipela i hatwok long painimaut tingting bilong ol pipel, na yupela hia long Port Moresby yupela i tok maski."

Balimo

Wanpela man, nem bilong em Okitanda bilong Ialibu, i tok kantri i no mas kisim selp gavman inap long taim ol man bilong bikbus tru i laikim. Mista Thomas Tamnamba, wanpela tisa bilong Noten Distrik, i tok em i mobeta gavman i gat tupela hap bilong Haus Asembli nau long taim kantri i nupela yet. Ol man i orait long dispela tingting.

Kwikila

Long hap bilong Sentral Distrik hia 300 manmeri i tok ol i no laik ol man i hariapim selp gavman. Pastaim yumi mekim bisnis na skul i kamap moa moa yet. I gat sampela ples i no gat lokal gavman kaunsil yet. Olsem wanem yumi ken ting long selp gavman bilong ol? Mista Dirona Abe, presiden bilong Rigo lokal gavman kaunsil, i tok mobeta yumi no gat wanpela Administreta ol Australia yet i makim na bosim. Mobeta yumi gat wanpela namba wan gavman yumi yet i ken ilektim long laik bilong yumi.





WIL BALUS BILONG

ANSETT

YU LAIK FLAI LONG WANEM HAP
ANSETT I HEPI LONG KARIM YU I GO

Ansett I Gat Olkain Balus
Smok Balus Tri Ensin Tu Ensin Wan Ensin



We're inaugurating new services all the time. Like our new daily services to Kieta (Bougainville). And now we've made application for the right to fly direct to the American-owned island of Guam. Our fleet of modern aircraft has been increased by the addition of the brand new Twin Otter 300 series. Our staff is continually increasing and so are our world-standard facilities. In every way Airlines of Papua-New Guinea is truly representative of the vigorous growth of the Territory. Together, we're really going places.

ANSETT AIRLINES OF PAPUA NEW GUINEA
in conjunction with Ansett Airlines of Australia.

INSAIT LONG OL POLITIK

(I KAM LONG NEW GUINEA NEWS SERVICE)

pe i go antap nau

I gat gutpela nius i kamap long olgeta man i wok long ol plantasin bilong kopra, kakao, raba (gumi) ti, na kopi. Pe bilong ol i go antap wantaim moa. Dispela taim bai ol i kisim 42¢ (sens) moa long mun.

Long yia i go pinis gavman i makim wanpela lain saveman bilong go lukluk raun long ol plantasin na givim ripot long ol samting ol i bin painim. Wanpela man bilong dispela komiti em Pasto Zurewe Zurenuoc bilong Morobe Distrik, na narapela em Mista Diana Abe bilong Papua.

Dispela komiti i tok, long tingting bilong em, ol wokman long ol plantasin i mas kisim moa pe. Ol i tok tu, ol man i bosim ol plantasin ol i mas lainim moa long mekim gut wok bilong ol.

Long mun Novemba gavman i bin apim pe, bai ol wokman i kisim 50¢ moa long olgeta mun. Nau gavman i laik skruim narapela 42¢ long pe olgeta mun. Olsem nau ol wokman i kisim 92¢ moa long mun. I olsem: nau olgeta wokman i mas kisim skel na laplap na ples bilong slip....tasol em i mas kisim yet \$5.90 long han bilong em

olgeta mun.

Gavman i tok sapos ol wokman i no laik kisim skel na ol arapela samting na ol i laik wok mani stret, ol i mas stretim tok pastaim wantaim bosman bilong plantasin. Bipo gavman i no laikim dispela pasin bilong wok mani stret. Tasol nau em i samting bilong ol wokman na ol bosman; ol i mas kibung long dispela samting taim ol i kontrak yet.

Long mun Mas bai Haus Asembli i toktok long sampela arapela tingting i stap insait long ripot bilong dispela komiti bilong lukaut long ol

plantesin.

Gavman i tok se, bipo em yet i strong ol bosman bilong plantasin i mas givim hap mani tasol long ol wokman na narapela hap hia i bilong baim kaikai na laplap na haus bilong ol wokboi. I olsem wanpela papa i lukautim pikinini bilong em na i givim em kaikai, na laplap, na haus samting. Tasol nau gavman i laik ol bosman i no ting ol wokboi ol i pikinini tasol. Ol i bikpela man pinis. Nau ol yet inap long baim kaikai bilong ol sapos ol i kisim bikpela hap mani moa.

Insait Long Tok Hait Bilong Wes Irian

Wanpela man i wok wantaim ol ami bilong Australia, Nu Silan, na Amerika i tok, em i tru tripela kantri hia i wokim sampela ples long Wes Irian bilong bagarapim ol bom ol arapela kantri i laik salim i go long mipela. Pasin bilong dispela kain samting i olsem: ol i sutim sampela roket o bom i go antap na i bungim ol arapela bom bilong ol birua i laik bomim yumi. Na tupela bom wantaim i pairap antap long ol klaut na i no gat man i bagarap.

Ami i tok i gat 7-pela kain ples olsem bilong lukautim gut yumi na ol Australia. Ol 7-pela i stap nabaut long sampela kantri na ailan long biksolowara bilong yumi.

Wanpela ripota, Mista John Ryan, bilong Niugini Nius Sevis, i bin

toktok wantaim planti pipel i save long dispela ples ol i kolim Wamena long Wes Irian.

Mista Ryan i tok em i no klia yet long as bilong ol wok ol i mekim long ples Wamena long Wes Irian. Las taim mipela i bin rait long dispela samting insait long niuspepa WANTOK. Sampela man i tok ol bensin (inap 130,000 galon) i bilong tupela helikopta bilong kopa kampani ol i kolim Kenekot. Na tu wanpela liklik balus bilong Wewak i wok long karim planti bensin long Wamena i go long sampela arapela smolpela ples balus.

Wanpela niuspepa i kam long Indonesia i tok, gavman bilong ol i lusim planti mani nau long stretim tru ol ples balus bilong ol.

Ol Man i Pret Long Wes Irian

Hetman bilong Visiting Misin bilong Yunaitet Nesens, Sir Denis Allen, i tokim ol pipel bilong Vanimo klostu long arere bilong Wes Irian, ol i no ken pret long ol Indonesia.

Long Vanimo wanpela man i askim Sir Denis, sapos ol Indonesia i laik kam stilim kantri bilong yumi, bai Yunaitet Nesens i kam helpim mipela o nogat? Dispela man i no bilip bai ol i kam, long wanem taim Indonesia i stilim Wes Irian long ol Holan, ami bilong Yunaitet Nesens i no helpim ol liklik.

Sir Denis i bekim tok i spik: em i wok bilong Australia bilong lukautim Niugini. Sapos ol i no inap, bai Yunaitet Nesens i ken helpim ol.

Long wanpela narapela ples klostu long Wes Irian, nem bilong en Te-

lefomin, wanpela Papuan i askim ol Yunaitet Nesens bai ol i laik mekim wanem long Papua. Man hia i laikim bai Yunaitet Nesens i kisim Papua olsem teritori bilong en yet.

Sir Denis i bekim tok olsem: em i samting bilong yupela pipel bilong Papua na Nu Gini, yupela i laik mekim wanem samting long kantri bilong yupela.

Ol man hia i raun long teritori bilong lukim ol pasin bilong sindaun na bisnis bilong ol pipel, bai ol inap givim gutpela tok long Australia, olsem wanem Australia i ken mekim moa moa yet long helpim go het bilong kantri. I no wok bilong Yunaitet Nesens bilong tokim ol pipel bilong Papua na Nu Gini ol yet i mas mekim wanem samting.

klap bilong ol yangpela fama

(I KAM LONG MARGARET FITZGERALD)

Luteran Misin i bungim tingting bilong ol lain bilong en na i salim dispela tok i go long ol hetman bilong Dipatmen bilong ol Skul (Edukesen) long Port Moresby.

1.) Ol praimer skul i mas redim ol sumatin long mekim gutpela wok long ples, na i no long go long haiskul tasol.

2.) Bilong redim ol sumatin olsem, skul i mas givim narakain save long ol; em i mas gat buk na tisa bilong dispela kain samting. Inap nau i no gat.

3.) Mipela i ting i no stret nau ol tisa na skul i hat tru, ol sumatin i mas lainim tok Inglis tasol. Em wanpela samting tasol i bikpela tru long ai bilong ol. Mobeta ol praimer sumatin i skul long ol samting bilong wok didiman na bilong mekim ol arapela kain wok. Na watpo tu ol i tambu long skul long arapela tok ples?

4.) Ol sumatin tasol i save tumas em ol i mas go het long haiskul na vokesenel skul (skul bilong lainim ol kain kain wok).

5.) Long haiskul tu ol tisa i mas givim sampela save long ol sumatin bilong helpim ol long laip insait long Niugini yet. Ol i no mas bihainim skul bilong ol arapela kantri tasol.

6.) Olsem long haiskul tu inap fom 2 ol sumatin i mas lainim ol kain kain wok man i save mekim long han bilong em. Olsem tasol ol i redi long laip tru.

Mipela long Luteran Misin mipela i strong ol man i bosim ol skul bilong mipela long Port Moresby i mas redim

skulboi na skulmeri long stap gut long dispela kantri yet. Olsem tasol na ol i no ken lusim ting long givim save long ol samting bilong wok didiman.



Tei Abal

Nogut Kilim Memba

Long mun i go pinis, Mista Tei Abal, lida bilong Kompas Pati, i tok se, em i pret ol man bilong Hailans inap kilim indai ol memba bilong Kompas Pati i stap long Haus Asembli sapos ol i vot long kisim selp gavman kwiktaim.

Mista Abal i stap long Kanbera na i tok Mista Whitlam i paulim tingting bilong planti man long Niugini long ol promis bilong selp gavman i kamap kwiktaim.


Em i tok olsem: "Sapos mipela ol memba bilong

Hailans i no vot long mekim dai dispela tok, mipela i pret bai ol man long ples i kirap kilim mipela indai. Ol i no laikim tru dispela tok long selp gavman i kam hariap."

Mista Abal i tok Kompas Pati i gat 40 memba bilong Haus Asembli insait long en pinis. I gat 10-pela narapela memba i wet yet long harim as tingting o platfom bilong pati.


Pati hia i no laikim selp gavman i kam isi isi tumas, tasol em i no ken kam hariap tumas tu.

SANYO



TEP RIKODA

Smolpela tru. Strongpela moa. I no kostim planti. Yu inap yusim long bateri tasol.



NAWAWAN REDIO bilong harim musik na nius. Yu baim Sanyo long jiklik mani tasol. Karim Sanyo i go long ples bai ol i anamas tru, bai yu gat namba.

Ol samting bilong SANYO i kamap long dispela kampani hia:

PIKAP NA REDIO WANTAIM

Sanyo - samting tru. Sanyo - smat moa. Tupela spika. Yu laik harim redio? Orait. Yu laik pilai rekot? Orait. Sanyo i redi - oltaim. Maski lektrik. Bateri inap.

TERRITORY AGENTS

BRECKWOLDT & CO. (N.G.) PTY. LTD.

PORT MORESBY
P.O. Box 1549, Boroko.

MADANG
P.O. Box 185.

LAE
P.O. Box 557

RABAU
P.O. Box 222.

MT HAGEN
P.O. Box 237.

WEWAK
P.O. Box 178.

KIETA
P.O. Box 77




Ol yangpela meri hia i stap long skul samap. Bihain bai ol i skulim ol mama long ples. Em i gutpela wok tru bilong ol meri.



Ol man hia i tren long bilong telepon. Ol i bra i gat samting olsem 100 rim kain kain tok i go.



Tupela skulmeri hia i traim hat long kisim gut save long praimer skul. Planti tuasen sumatin i stap long ol skul bilong Teritori bilong yumi.



Wanpela misis i save t masin bilong rait, ol i skulim wanpela meri Papu i save paitim taiprait.



ilong skruim ol waia
a insait long gumi hia
pela wanpela i save ka-



Long dispela poto wanpela sista i lainim tupela nes long pa-
sin bilong painim marasin bilong givim long ol sikman.



ng pasin bilong paitim
ipraita, em i wok long
planti wok long ol meri



Ol tripela man hia i wok insait long haus kamda. Tupela i wok
long penim wanpela sarang na narapela i bapim wanpela dua long
sanpepa. Man, ol i save tumas long wokim ol gutpela samting.

Ol Kain Kain Nius

Morobe

Long Morobe Distrik, gavman i laik baim 35,000 eka graun i gat planti diwai bilong wokim plang. Tasol em i no inap long wanem hap graun hia ol i kolim Maiana, tupela lain pipel i pait long en yet. Em ol man bilong Suena na ol man bilong graun yet.

Sister i bosim Angau Nesing Skul, Sister J. Theile, i singaut long ol yangpela meri long Papua Nu Gini i winim fom 2 bai ol i ken kam kisim trening long kamapes. Sister J. Theile i tok ol i wetim 40 yangpela meri bai mekim tripela yia trening. Inap nau 20 i bin rait tasol i gat ples yet long 20 moa.

Dipatmen bilong skul i opim pinis tripela nupela skul long Morobe distrik. Ol dispela skul i stap long Konge insait long hap bilong Kabwum kaunsil, long Bumbum, na long Pararua long hap bilong Watut. Wanpela wanpela skul bai i kisim 40 sumatin long standet wan.

Huon Lokal Gavman Kaunsil i bin wokim wanpela haus long presiden bilong ol. Wanpela man bilong Butibum viles, Mista Ani, i bin wokim dispela haus. Em i kostim samting olsem \$2,000.

Wanpela ten wan Papua-an na Nu Ginian i wok long bisnis na gavman i pinisim pinis wanpela kain kos bilong ol wokman long Teknikal Koles. Dipatmen bilong ol wok-

man i ranim dispela kos. Em i wanpela namba wan taim ol i mekim kain kos olsem bilong lainim ol wokman. Dispela bai i givim moa save long ol man i ken ranim ol bisnis na stretim ol kain trabel i laik kamap long sindaun bilong ol.

Bogainville

Wanpela komiti bilong ol skul long Morobe i tok olgeta praimer skul i mas lainim ol samting long tok Inglis na tok Pisin wantaim. Tasol ol sumatin i no mas skul long ol tok ples bilong ol.

Lomua, Tatapu, Korikuna, na Iagnbaku viles i bin kirapim wanpela nupela samting i olsem kopratif beng ol i kolim Kredit Yunion. Wanpela wanpela beng i gat 50 memba. Em i namba wan taim ol i kirapim dispela pasin long ol ailan. Wanpela wanpela pater bilong misin katolik i statim.

Bougainville kopa kampani i bin givim \$80,000 i go long 17 man em ol i papa long hap graun ol i kolim Kumo. Long dispela hap graun, kampani i kisim waisan long wokim ol rot na bris long hap bilong Arawa na Kieta.

Em hia tupela draipela trausel moa. Wanpela i gat hevi inap long 750 paun na taim ol i laik skelim, hevi bilong em i brukim masin bilong skelim ol samting. Dispela wanpela trausel inap long givim kaikai long 200 manmeri. I gat 15 boi i mas taitim bun bilong pulim em i kam sua.

Hetman i givim \$37.00 long ol man i holimpas

dispela trausel. Long neks de long nait ol i kilim dispela namba tu trausel.

Manus

Ol Vokesinal Senta i kamapim gutpela kain trening long ol skul liva insait long Teritori. Long yia i go pinis Liap Vokesinal Senta i bin mekim sampela gutpela wok tru. Ol sumatin i bin wokim wanpela kanu long bilong em inap long 50 fut na em inap long karim 40 pipel. Hevi bilong em inap 3 tan. Inap 5-pela mun wok bilong dispela kanu i pinis. Ol tu i bin planim tu 30,000 ananas na ol i save kisim pis long umben.

Rabaul

Mista Tore Lokoloko, Ministerial Memba bilong Helt, i bin opim pinis wanpela bikpela haus sik. Medikol Ofisa bilong ol Niugini Ailan Dokta Becker, i amamas tru long ol lokal pipel long gutpela help bilong ol. Em i tok long ol dispela helpim i mekim wok bilong dispela bikpela haus sik i pinis hariap. Dispela bikpela haus sik em i gat wanpela taun klinik i kostim \$27,000 long wokim. Hap bilong dispela mani i kam long ol klap na long ol lokal pipel.

Madang

Moa long 200 pipel long ples Siar, Kranget, na Biliau viles i bin kamap long wanpela miting long Siar. Ol pipel i bin telimautim ol wari bilong ol long graun long Mista Agmai Bilas, Ministerial Memba bilong Tret na Industri.

Ol i tok ol i no gat inap graun long ol pipel

long mekim wok bisnis. Mista Bilas i tok gavman yet i bin baim graun bi-po, orait nau gavman yet i mas helpim ol man long kisim bek.

Papua

Ol i bin makim pinis Mista Martin Tamarua long go long Australia na lainim ol sampela samting bilong kisim potto. Em bai i stap inap wanpela yia olgeta. Tamarua em i kam long Kilakila viles insait long Sentral Distrik.

Mt Hagen

Tupela kaunsila bilong Maunt Giluwe lokal gavman kaunsil bai i go long Port Moresby long stap insait long miting bilong Haus Asembli long Mas. Em tupela kaunsil: Kaunsila Tebu na Kaunsila Kelgai. Namba tu kiap bilong Mendi, Mista B. Mulchay, i tok em i namba wan taim tru long dispela kaunsil i salim memba bilong en i go long Port Moresby.

Lake Murray

Ministerial Memba bilong ol wok didiman, Mista Tei Abal, i bin go long Lake Murray long opim wanpela faktori bilong wokim raba o gumi. Mista Warren Dutton, memba bilong Not Fly, Mista Ian Pendergast, na Mista S.P. Saville tripela i go wantaim Mista Abal.

Sepik

Presiden bilong Gauri Lokal Gavman Kaunsil, Mattias Yambupei, i givim pinis wanpela kaving long namba wan gavman Mista L. W. Johnson long

ofis bilong em. Kaunsila Yambupei i wanpela long ol 13 kaunsila i bin lusim Port moresby long go lukluk raun long Tasmania. Em i bin givim dispela kaving long makam olsem dispela i namba wan taim em i lusim Niue.

Lae

Em i namba wan taim Hausing Komisin bilong Papua na Nu Gini i givim skolasip long 4-pela sumatin. Nem bilong ol; Neville Siria (Morobe), Lambert Kelau (Manus), Vele Kali (Sentral), na Aree Miau (Galp). Tupela sumatin bai i stadi long ol pasin bilong ol wok bisnis. Arapela tupela bai i stadi long ol pasin bilong bosim taun na long wokim ol haus samting.

Hausing Komisin i laik givim wok long ol dispela 4-pela sumatin gen taim ol i pinisim stadi bilong ol.

Goroka

Ol draiva bilong ol bikpela trak i save karim ol kago i go long Hailans Haiwe i bin toktok planti. Long wanem ol stilman i save stilim ol kago. Olsem nau ol plisman i painimaut 14 pipel bilong Chimbu i save stilim ol kago nau ol i stap long kalabus. Man i bosim ol plisman, Mista Dutton, i tok ol trak bilong ol dispela kampani i mas i gat umben waia bilong holimpas ol kago.

Rabaul

Em i namba wan taim 5-pela meri bilong ol Baining i kamap mekim trening kos long Gaulim Tisa Koles klostu long Rabaul. Ol bai i stadi long helt na pasin bilong lukautim gut ol samting. Bai ol welfe na helt ofisa yet i ranim dispela trening kos.

Wanpela tokman bilong gavman i tok olsem, ol dispela meri Baining i lainim dispela wok bilong go het wantaim ol arapela meri long Nu Briten.

Mt Hagen

Ol pipel bilong Wurup na Tilling long Westen Hailans i givim \$1,300 long Mt. Hagen lokal gavman kaunsil long wokim rot. Ol pipel bilong dispela hap na ol pipel long Angalimp na Nebilyer i wok long helpim ol kaunsil long wokim rot.

Mt. Hagen kaunsil i askim gavman long givir \$10,000 long wokim wanpela bris i stap namel long Kindeng na Konapina.

Long Mt. Hagen hospital, 22 nes meri i lusim wok bilong ol. Ol dispela lain meri i ranawe long wanem ol i wok hat tumas na ol i no kisim bikpela pe. Tasol namba wan dokta, Mista Milton

Lewis, i tok ol i no wok hat tumas. Bihain long ol i go pinis, ol nes na sista i wok hat tru long lukautim ol sikman.

Port Moresby

Ol pipel bilong Goilala i bin paitim wanpela plisman nogut tru. Nem bilong plisman hia Patrick Tika. Ol i bin bagarapim tupela han na tupela leg wantaim bak-sait bilong em. Ol i bin karim em i go long haus sik na em i go long hauc sik na em i hatwok long kamap orait.

Insait long wanpela bikpela miting bilong pipel i wok wantaim na mekim kantri i go het, Mista Oala Oala Rarua i tok se, i mas gat wanpela lain man i stadi long independens i wanem samting. Ol dispela lain man i no mas memba bilong Haus Asembli, tasol ol i mas gat planti save.



nius bilong ol kantri

bikpela guria

LOS ANGELES:- Long mun i go pinis, wanpela bikpela guria moa i mekim indai 64 manmeri long Kalifornia long Amerika. As bilong trabel em hia: insait tru long graun wanpela bikpela hap graun i pundaun na i subim wanpela bikpela lain i go antap. Wanpela haus sik i kapsait olgeta na 45 olupela soldia indai pinis.

niugini i namba wan

MELBOURNE:- Minista bilong wok wantaim ol

narapela kantri, Mista William McMahon, i promis bai long dispela yia Australia i givim bikpela mani moa long helpim ol arapela kantri. Namba wan kantri long ai bilong ol Australia em Papua na Nu Gini tasol. Australia i laikim tumas bai dispela Teritori i kisim selp gavman na i kamap kantri tru inap long bosim em yet.

i no salim pas

LONDON:- Ol lida bilong asosiesen bilong ol man i wok long pos ofis na long ofis bilong ol telepon, ol i tok ol i no laik go bek long wok yet.

Ol i pasim ol 200,000

wokman bilong ol inap long 5-pela wik nau. I olsem, inap long 5-pela wik nau ol man bilong Englan i no inap salim pas i go. Na ol i no save kisim pas tu.

balus i pundaun

SYDNEY:- Wanpela bikpela balus moa bilong ami bilong Amerika i pundaun nogut long ples balus bilong Sydney.

Boskru bilong balus na ol 28 pasindia ol i kamap gutpela. I no gat wanpela i bagarap.

Taim ol i flai i stap antap moa, wanpela samting i pairap insait long balus. Olsem na ol i tanim bek tasol ol i no inap putim ol wil taim ol i kam daun.

indonesia no inap stilim

CANBERRA:- Hia wanpela tokman bilong Dipatmen bilong ol Teritori i spik, em i no bilipim dispela tok ol Indonesia bai stilim Papua na Nu Gini.

Em i tok Indonesia i lusim planti mani tumas nau long Wes Irian. Na tu Indonesia i laik pren wantaim Australia.

Tokman hia i bekim tok long wari bilong wanpela man i ranawe long Wes Irian, nem bilong em Mista Simon Meset. Mista Meset i bin tok se, ol tisa bilong Wes Irian i save skulim ol manki yet, wanpela de bai ol i mas go helpim ol Niugini rausim ol Australia.

OLGETA KAIN KAIN SEL

BILONG SIP, TRAK, PLANTESIN
O HAUS I GO ANTAP LONG HAP KA

MIPELA SAVE WOKIM GUT

Mipela save wokim gut sel long olgeta kain kain laplap. Ol i nambawan kain laplap bilong sanap strong long san i hat na bikpela ren long dispela kantri hia. Laplap hia ol i kolim katen, o kanis, o nailon. Sapos yu laik askim sel i kostim hamas, yu mas raitim pas i kam long mipela stret na toksave long wanem kain sel yu laik, na bikpela bilong em. Na mipela bekim pas i kam bek stret long yu. Ating ol kepten bilong ol smolpela sip i save pinis long mipela. Faktori bilong mipela i save tumas long wokim planti sel moa bilong ol Yu rait long mipela pastaim!

* MI KEN SALIM I GO INSAIT LONG 24 AUA

* SALIM I GO LONG OLGETA HAP PLES

CANVAS & CORDAGE PTY. LTD.

AH CHEE AV., RABAUL.

P.O. BOX 476

PHONE 2008.

Church Administration Business

All institutions have printing needs
which are most efficiently met by



KRISTEN PRES

Box 676, Madang

Printing Service

Our specialties: Pamphlets, programmes,
dockets, books with hard and soft cover

Mail Orders Welcome

Ask for quotations and samples

helpim bisnis bilong yu

Bipo mi bin tok olsem wanem ol Bisnis Ofisa bilong gavman i bin i go raun long planti hap bilong Teritori long helpim ol bisnismen mekim gut bisnis bilong ol.

Bikpela samting tru long bisnis em i mani tasol. Sampela mani i wok long go insait long bisnis na sampela i go ausait. Bisnismen i mas save hamas mani em i lusim long mekim wok bisnis bilong em. Em tu i mas save hamas mani i kam insait long bisnis bilong em. Sapos em i tromoi planti na kisim bek liklik tasol, bisnis bilong em i no stret.

Sapos yu save long ol dispela samting orait, nau tasol yu inap mekim wok bisnis tru. Bisnismen i ken save olsem wanem? Sapos em i raitim long buk bilong em, em yumi kolim Ofisbuk.

Planti pipel long Niugini i ting raitim samting long ofisbuk em i hat tumas. Ol i tingim dispela bikos ol i no bin train mekim dispela samting. Ofisbuk bilong liklik bisnis em i isi tru. Bisnis Ofisa bilong gavman long hap bilong yu i ken helpim yu long dispela samting. Em i gat wanpela liklik buk nem bilong em Tret Stua (Trade Store) na em i kostim 5¢.

Pastaim yu go lukim Bisnis Ofisa bilong yu na bai yu lainim liklik. I gat planti man i long-long liklik long bisnis. Sapos ol i baim wanpela samting long 10¢ na bihain ol i putim kos bilong em i go antap inap 12¢, ol i ting ol i mekim profit inap 2¢. No gat, em i no stret yet. Mani bai i kamap we long baim stuaman na rot bilong bringim dispela samting? Ating ol i mas putim prais inap 15¢ bilong baim ol dispela

samting. Olsem yu lukim, bisnis tru i no isi samting.

Na yumi no ken lainim sapos yumi no save raitim ol samting long buk. Man i rait long ofisbuk, em i mas tingting long dispela ol samting:

1. Yu lusim hamas mani long baim kago, long baim rot na baim wokman?
2. Yu kisim hamas mani long wok bilong yu?
3. Hamas mani ol arapela man i dinau long yu.
4. Hamas mani yu dinau long arapela man?
5. Hamas samting yu odaim pinis?
6. Hamas samting i stap insait long stua bilong yu?


Sapos yu save long ol dispela samting, orait, nau tasol yu inap mekim wok bisnis tru.

Olsem mobeta yu go lukim Bisnis Ofisa klostu long ples bilong yu. Em i pren bilong yu. Em i ken helpim yu long mekim gutpela ofisbuk, bai i no gat trabel long taim bilong tromoim takis.

Port Moresby.

I no longtaim ol i bin makim ol 5-pela ofisa bilong gavman na 5-pela lokal gavman kaunsil bilong Teritori long go long Australia long mekim wanpela trening kos. Em hia nem bilong ol; Vavine Tauni na Timothy Tobogani (Madang), Allan Lapu (Wabag), Daniel Noah (Kavieng) Henry Veratau (Is Sepik), Sophie Vuvut (Gazelle), Nicholas Tomode (Kandrian), Memi Jondi (Baiyer Riva), James Kwat (Okapa), na James Kwat (Okapa), na Walo Kovea (Marshall Lagoon) Mis Vuvut em wanpela tasol i kaunsila wantaim ofisa bilong gavman long Papua Nu Gini.

Lo Bilong Dring



O yes, ol wantok, mi lukim wanpela trabel i save kamap hia long Niugini long taim bilong pati o long fotnait bilong ol wokman. Dispela trabel em hia. Sapos ol man i laik dring long taim bilong pati, sing-sing o fotnait, planti ol i no save gut long ol lo o pasin bilong dring. Olsem ol i save spak, trauf na bagarapim bodi bilong ol.

Yumi save, dring em i gutpela samting. I no gat rong long en. Tasol dring i olsem ka. Sapos man i save gut long ol lo bilong ka na bihainim, i no gat trabel. Tasol sapos draiva i no save gut long ol lo bilong draivim ka o pasin bilong stiaim gut ka, lukauf--- bikpela trabel bai i kamap. I wankain

tru long dring. I gat lo long dring tu. Sapos man i save bihainim ol dispela lo i no gat trabel. Tasol sapos man i no bihainim gut ol dispela lo, sapos ol i dring nabaut nating, orait, bai ol i spak, trauf na trabel nabaut.

Nating i gat tripela bikpela lo bilong dring. Em hia:

1) Yu no ken miksim tupela kain dring. I olsem, sapos yu stap dring SP, orait yu no ken dring VB o 4X. O sapos pren bilong yu nau i laik givim yu ram o wiski, yu no ken kisim na dring. Yu mas tokim em, "Tenkyu, tasol mi gat dring, na mi no laik abusim tupela wantaim." Bilong wanem yu mas tok olsem? Bikos dispela kain pasin i save bagarapim man stret,

Wantu bai yu spak na yu longlong. Lukim waitman; em i no save miksim dring. Nogat tru. Sapos em i dring SP, em i no ken kisim narapela kain dring.

2) Yu dring isi isi. Ram, gin, wiski, SP, i no wara nating. Orait yu no ken daunim olsem wara, orait wantu yu save pinisim glas wara. Tasol sapos yu laik dring ram o gin samting yu mas go isi isi. Tingting. Dring em i samting bilong sindaun, toktok, amamas wantaim ol pren bilong yu. I no samting bilong resis wantaim arapela man na daunim planti botol o planti glas ram samting. Dispela pasin bilong resis na kolim namba bilong ol botol o glas yu pinisim pinis, em i asua bilong planti trabel.


3) Yu mas kaikai pastaim. Sapos yu laik dring o yu laik go long hotel, orait yu mas kaikai pastaim. Sapos yu kaikai

pastaim, ol dring i no ken bagarapim bel bilong yu. Tasol sapos yu kaikai pastaim na yu ran nating long hotel na wok long dring, wantu bai yu bagarap.

Long Baibel Jisas yet i givim wain long ol man taim ol i sot long wain. Tasol Jisas em i no save spak. Em i bihainim gut ol lo bilong dring. Yumi tu, yumi bihainim ol dispela lo na yumi no ken painim trabel long taim bilong dring.

Kamap Het Tisa

Long Goroka Tisa Koles, 37 tisa i mekim wanpela kos bilong kamap olsem het tisa. Ol bai mekim dispela kos inap 10-pela mun. Bihain bai ol i ken kisim ples bilong ol waitman i stap hetmasta nau. Planti arapela kain kos olsem i kamap pinis long Port Moresby, Madang na sampela tisa koles bilong ol misin.



CARPENTERS

NAMBA WAN STUA LONG PAPUA
NA NEW GUINEA BILONG BAIM
GUTPELA KAIKAI NA OLGETA
KAIN SAMTING. TAIM YU LAIK
GO LONG STUA...YU GO LONG
STUA BILONG CARPENTERS

PORT MORESBY MADANG RABAU LAE

Foapela i Winim Prais



Foapela sumatin bilong Sepik Distrik i bin winim prais long go long haiskul, na sampela arapela man bai i baim skul bilong ol. Em yumi kolim skolasip.

Ol soldia i bin kam long Wewak long mun Septemba long tingim de ol i winim woa, ol yet i

givim dispela ol prais.

Ol soldia bilong namba 2/4 lain soldia bilong Australia i givim prais long wanpela boi na wanpela meri. Antonia Siro-ro i gat 13 krismas i win na bai i go long Yarapos Haiskul. Joseph Kamasi i gat 12 krismas i win tu na bai i go

long Brandi Haiskul.

Wanpela soldia bilong dispela lain yet, nem bilong em Mista W. MacLennan, em wanpela laik baim skul bilong tupela sumatin moa. Olsem na Robert Gobout i win na em bai go long St. Xavier Haiskul. Na Philomena Auwinimy bai go long Yarapos Haiskul.



Antonia Siro-ro



Joseph Kamasi




Philomena Auwinimy



Robert Gobout

WEWAK TIMBERS PTY. LTD.
(MASTA SNO NA MASTA ED)
PHONE 93 & 228

OL HAUS BILONG MIPELA I STRONG TRU
TASOL I KOSTIM LIKLIK TASOL



3 Bedroom



2 Bedroom

(All houses passed by the Building Board)

long somil bilong mipela yu inap kisim olkain plang - painim ol samting i redi bilong wokim haus - painim ol kamda bilong wokim haus

ALL TYPES OF SAWN TIMBER
Low cost houses built or material supplied

Also at:

BOUGAINVILLEA DR. MADANG, PHONE 2214

Nupela Bisnis

Ol pipel bilong hap bilong Pagwi long wara Sepik bai i gat nupela bisnis bilong hukim na salim pis. Rotari Klap bilong Australia na Amerika i bin baim wanpela draipela bokis ais lektrik. Em i kostim inap \$5,600 na em inap tanim 1,000 paun pis long ais. Olsem tasol ol i no sting na bai ol i karim long balus i go long ol stua bilong Wewak na arapela bikples.

Pater Joseph Egan i kirapim dispela nupela bisnis wantaim ol pipel bilong Pagwi na Burui. Olgeta wantaim i gat wanpela kopratif. Ol i wokim pinis wanpela dabol kanu wantaim bet bilong bokis ais; bai tu i gat moto na wanpela haus antap long tupela kanu.

Wanpela hetman bilong Rotari Klap bilong Wes Australia, Mr. Ted Cock-

ram, i kam lukim ol wok Pater na ol man i bin mekim pinis, na bel bilong em i gut tru. Klos-tu olgeta samting i redi nau long stat.

Long dispela hap bilong Sepik i gat planti pis moa na dispela nupela wok em soim rot bilong kirapim wanpela faktori bilong wokim tinpis long Sepik.

kaunsil nius

Bougainville

Ol 6-pela lokal gavman kaunsil bilong Bougainville Distrik bai i lusim \$278,000 long dispela yia long ol wok ol i laik mekim. I gat moa olsem 60,000 pipel insait long dispela hap.

Mista Mark Sage, namba wan lokal gavman ofisa bilong Kieta, i tok bai ol Bougainville kaunsil i tromoi moa olsem \$31,000 long ol wokman tasol... long wanem ol i stap wokim planti rot na bris na ples balus.

Ol

Kaunsila Kam Bek

I gat 13 lokal gavman kaunsila i kam bek long wanpela lukluk raun long Tasmania.

Em hia nem bilong ol kaunsila i mekim dispela lukluk raun: Lebas Mark

(Milne Bay), Samson Purupuru Toavi (Tinputz), Falema Larivita (Is Kerema), Kumai Sundu (Mt. Wilhelm), Lauren Maris (Tikana), Wesley Karirian (Namatanai), John Simiri Kehu (Siwai), Theodore Kaiwa (Hoskins), Matias Yambupei (Gau), Andrew Yenbangu (Sausia), Kaki Angai (Sumgilbar), Robin Wainette (Kiwai), Bisar Udid (Karkar). Klostu olgeta dispela man i presiden o vaís presiden bilong kaunsil bilong ol.

KLASIFAIT

PABLIK NOTIS

PRE BUK. Yu laikim buk long beten long nait? Salim pas long Booklet, Box 1096, Boroko. Kisim nating.

Wantok Publications, P.O. Box 298, Wewak, i wokim, na Wirui Pres long Wewak i prinim.



Seten i traím Jisas i spik: "Sapos yu Pikinini bilong God, yu tok na ol dispela ston i ken tanim i kamap bret." Tasol Jisas i bekim tok, i spik, "Baibel i tok, 'Bret tasol em i no inap givim laip long man. Nogat. Man i mas kisim laip long olgeta tok i kamap long maus bilong God.'" (Matyu 4: 3,4.)

(Baibel Sosaiti i orait long mipela i ken prinim dispela piksa.)

Planti pipol oli askim

Tutt Bryant emi gat wonem samting long stoa bilong ol.

Emi gat planti kain masin nau sperpat long en tu. Nau hia yu lukim sampela mipela igat long stoa long mipela. Sapos yu laikim arapela samting bai yu askim long stoa long mipela long wonem TUTT BRYANT igat planti samting long ol masin, moto nau arapela samting. Em hia mi kolim sampela tasol mipela.

ALLIS CHALMERS <i>(earth moving equipment)</i>	LIGHTBURN <i>(cement mixers)</i>
APAC <i>(lift gear)</i>	LINCOLN WELDERS
AVIS RENT-A-CAR	KAWASAKI OUTBOARDS
BEDFORD <i>(trucks)</i>	KITTEN <i>(automotive products)</i>
BROOMWADE COMPRESSORS	MERCURY OUTBOARDS
CARIBBEAN BOATS	MICHIGAN LOADERS
DIAHATSU	MONROE-WYLIE AUTOPARTS
DUFFIELD HOSES	ONAN <i>(engines and generator sets)</i>
EQUIPMENT INVESTMENTS <i>(hire purchasing and leasing facilities)</i>	PACIFIC-ACE EQUIPMENT
FIAT TRACTORS	PACIFIC PUMPS
FIRESTONE TYRES	P.E.P. <i>(automotive products)</i>
GENERAL MOTORS HOLDEN	PERKINS DIESEL
GENERAL MOTORS <i>(diesel)</i>	PHOENIX ASSURANCE
HEALTHWAYS DIVING EQUIPMENT	SMITH'S INSTRUMENT
HOWARD <i>(Agricultural)</i>	SUZUKI MOTOR CYCLES
I.S.S. <i>(safety equipment)</i>	VOLVO-PENTA <i>(marine engines)</i>
	YANMAR DIESEL
	YOKOHAMA TYRES



Tutt Bryant Pacific Limited

BRANCHES: PORT MORESBY, LAE, GOROKA, MADANG, RABAU, KIETA
AGENTS: MT. HAGEN, WEWAK, HONIARA (BRITISH SOLOMONS)
WRITE: P.O. BOX 326, PORT MORESBY, T.P.N.G.



Overseas rates on application.

Sapos mipela i salim i kam long balus:

7 pela taim i kostim	\$1.00
14 pela taim i kostim	\$2.00
21 pela taim i kostim	\$3.00
28 pela taim i kostim	\$4.00

Wantok Publications Inc.,
P.O. Box 298, Wewak

ADVERTISING RATES

Casual \$2.00 per single column inch.	
3 insertions over 12 months	\$1.85
6 insertions over 12 months	\$1.70
12 insertions over 12 months	\$1.55
24 insertions over 12 months	\$1.40
Classified Advertising: 65 cents first 2 lines; 30 cents each additional line.	


Published 1st and 3rd Wednesday of the month.



Siaman bilong Yunaitet Nesens Visiting Misin, Sir Denis Allen, i sanap toktok wantaim sampela nes long haus sik bilong Goroka. (D.I.E.S. poto)



Memba bilong Yunaitet Nesens Visiting Misin bilong Irak, nam bilong em Mista Adnan Raoul, i sanap toktok wantaim ol man insait long haus kaunsil bilong Kainantu long Isten Hailans. (D.I.E.S. poto)



ens Visiting Misin
 bilong Asaro long
 ol hia (kirap long
 ista Paul Blanc, na
 n tru em Mista Jim
 ilans long dispela


Ol wanblut na pren i kam long Australia long wampela lotu
 ol i mekim long bikpela matmat bilong ol soldia i stap long
 Port Moresby. Nau tasol wampela misinari long Wes Irian i
 painim wampela balus DC3 pulap long bun bilong ol 28 soldia
 na ol i bringim i kam long planim. Balus i bamim wampela
 maunten antap moa, na olgeta man i lus long taim bilong woa.



isin i go insait lukim wampela haus tam-
 long raithan. Mista Hicks, kiap bilong



Em hia nes bilong Telefomin, nem bilong
 em Josie Bungsep. Josie i kam long Dotivip
 Vilds na i bin wok wantaim Beptis Misin
 inap long 6 pela yia. Em i stap wan yia
 pinis long Australia bilong lainim pasin
 bilong wokim olkain naispela klos.



Sampe tok i Niug Terj kam Pe mi

TRI DOLA

Sapos yu salim \$3 (tri dola)

bai mipela i salim WANTOK

long yu inap long


WAN YIA

(dispela em i nupela ofa)

Sapos yu laik kisim niuspepa WANTOK yu mas salim dispela hap niuspepa i kam bek wantaim \$3 (tri dola). Adres bilong mipela em hia:
 WANTOK PUBLICATIONS INC.,
 P.O. BOX 298, WEWAK.

NEM BILONG YU HIA:

ADRES BILONG YU HIA:



MOA MANI LONG WOKMAN

Asempi i bin orait long ol 100 wokman bilong lain i mas im moa pe. Long yia 1971 ol i kisim \$11.80 long fotnait os ol i wok mani stret. Bihain pe i go antap moa yet.

Tu ol man o ofisa i pinisim long gavman i mas kisim moa malolo o pe lip. Man i mas gat kribmas o wok wantaim gavman ap 35 yia bilong kisim pe lip.

Wokman tu i strong ol bisnisman mas skulim moa Niuginian long sin bilong ranim bisnis na kimpim bisnis bilong ol yet.

Sta Touk Kapena, ministerial memba long bosim ol wok i toklok wantaim ofisa wokman long i faktori long Filip long Hailans

Sta Nasson Paulias, hetmen bilong geta skul long Is Sepik Distrik, i win setifiket long tisa Michael eke bilong Aitape.



19,841 Pinisim Standat 6

Pop i Kam Lukim

